

Li Laus



**LAUS
DE**

**PAUL
VALIÈRE**



Pau ASTRUC
Felibre MAJORAL

LAUS
DE
PAU VALIÈRE
(1941-2019)

Cigalo de l'Órt o de Lansargue

Santo-Estello de MENDE
-2021-

Cigalo de l'Orto de Lansargue

1876

Aleissandre LANGLADE

(1820-1900)

1900

Prousper ESTIEU

(1860-1939)

1940

Jan LADOUX

(1870-1951)

1952

Aguste DOUMERGUE

(1896-1970)

1971

Jòrgi GIRARD

(1919-2009)

2010

Pau VALIÈRE

(1941-2019)

2021

Pau ASTRUC

(1942)

Gento Rèino, Senhou Capoulié, car counfraises majorals, cars felibres, cars amics,

Es aquí un prèsfach pas debiais que de resuma en quauquos pajos, en uno binteno de minutos, la bido d'uno persounalitat de la meno del Majorau, Majoral que se dis en Lengo Nostro, en ocgebaudanes, lou Majoral adounco Pau Valière. Amai se aici saró sougamen questieu de sa bido « d'a-coustat », associatibo, de sas coumbiccieus prigoundos e umanistos, de soun enraicinamen soulide dins soun « chas el ». E a la debuto sa bileto de Pèiro-Bufèiro, sa regieu de Limotges e tout lou Lemosin, soun païsou dempièi lou brèç e pendent touto sa bido, o gairebé ; soun estachamen a sas bagous, a soun patrimoni, a sa lengo, e per couifa tout aquó, soun soulide engatjamen en lou Felibrige e a sa douctrino.

Mès abons, es de tradiccieu çou m'es abis, se ne crese tabe nostre brabe amic Pau Valière, que lou laus prounouçat a la memòrio d'un majoral defuntat siague debençat per lous mercejamens adreçats per soun successur.

Adounco, cars amics felibres, que me siague uei permes de merceja las Majoralos e lous Majorals, acampats en Consistòri e visiocounferencio, lou 20 de febríó darniò, de 2021, de m'abère elegit per succeda al rencurat Majoral Pau Valière, titulari dempièi 2010 de la Cigalo de l'Òrt o de Lansargue, e de m'abère durbit aità las portos de la noplo e sabento assemblado, presidado pel debouat Senhou Jaque Mouttet, Capoulié del Felibrige.

Preste juramen d'amerita la charjo que la grondo majouritat de bantres, cars counfraises Majorals, m'abètz fisado.

Bourrió qu'aqueles mercejamens anessiou en prumió a mous tres peiris que m'òu pourtat sus las fonts del batèmo del Majoralat :

-Majoral Joan FOURIÉ, Cigalo de l'Óulivié ;

- Majoral Gile DESECOT, Cigalo de Pourchiero ;

- Majoral Nadau LAFON, Cigalo de Gardoun, moun brabe besí d'Aubernho e del Cantal.

Que siagou mercejats per lur bienboulenco e lur arbitre embèrs ieu. Òu agut bien de merite !

« Un jorn, lo sabe, lo pus tard possible, quora lo creator me demandara pres de se, te durbirai la cleda dau vergier e tu podras un cop de mai 'nar te posar sus la pitre d'un Majorau noveu, per contunhar de far ausir ton chant melodios clafit d'amor e d'esperança. » Aità disió lou Majoral Pau Valière, quouro sa cigalo li fouguèt espinglado sus lou pitre.

Aquel jour es magairousamen arribat per bous, e de sutió, car Moussu Valière, car Pau, brabe amic ! Praco ieu aurió be pougut esta mai, que l'esperabe pas aquelo cigalo d'òr, amai se aro ne sou fièr, uno brabo suspreso, belèu un pau meritado tabe, que me dis quicom a l'aurelho, quauqu'us, lou diaple proubaple, coumo se dis en co nostre, en Lousero. Es crano, poulido, aquelo Cigalo daurado e lugissentò, e elo bougo, al rebers de nostre grelhet gabalo, o sous cousís, lous grelhs roèrgats e lemosins, qu'eles tabe stridulou al chaldet souguel de la (mièjo) mounthonho, tont e mai que la cigalo del mièchjour ! Praco l'ai dejà ausido chanta a moun aurelho aquelo Cigalo de l'Òrt !... E per darriós m'o semblat bous ausi reire, Pau, un reire franc, bienbengut, un reire tindaire, de cristal, un reire amistous, emplit d'esperonço, que me coubidabo amé bous, amé tu, que me tujabes, que me moustrabes lou chami...

Bòu assaja de pas te decebre, car amic !

Ai toutjour crane plase de me rememouria la Santo-Estello de Sent-Iries, de 2012, la Santo-Estello mai que mai « tiono », car Pau Valière, en co tieu, en Lemosin, uno de las prumièiros que practicabe, ieu. E, de fèt, se ieu ère encaro un pau « joube dins lou mestió », a la debuto mèsme dins lou Félibrige, cadun ou sap, tu ères a l'obro dempièi uno crano passado, mai de trento ons, dempièi l'annado de 1981 ! Aquó's èro al lendemo de la 51èmo Felibrijado del Lemosin, tengudo lou 20 de junh de 1980 en ta bilo de Pèiro-Bufèiro, ount abiós fach belo aculido al Felibrige que, de soun coustat, se durbiguèt per tu. *« Tirat per lo brave pretz-fach*

dau Felibrige se botet sul còp d'estudiar per poder 'ribar de trabalhar per la causo nòstro », nous diguèt lou Majoral Micheu Tintou, en parlent de tu, Pau.

De mai, coussi disió lou Capoulié, Jaque Moutet, per las òsseques, ount participabou uno quinzèno de Majorals : peirinejat a soun entrado en Felibrige pel Majoral Jan Deblois, a soun escolo, Pau Valière fouguèt pastat d'aquel engatjamen perdurable, d'aquelo fe mistralenco que jamai li desfautaro.

Tabé, d'annados de temps, fouguères lou secretari de la Mantènenco de Lemosin. Lou Felibrige, la lengo lemosino e soun païsou de Limotges, fouguèrou lou « fiá rouge » de ta bido bidento. Nasscut a Plavignac, en Lemosin, a dous passes de Pèiro-Bufèiro, a dos cambados de Limotges... Pau passèt aquí un crane temps en co de la mameto Anno, elo que attubabo de chandèlos per finta durmi lou crane e bloundinet nenet, al coustat del papeto Jausé, tournat blassat de la guerro de 14.

Pau, l'ainat dels 4 efents de Margarito, brabo femneto als uels berds, e del bèl Leion, chassaïre e peschaïre delampat.

Pau, lou nebout adourat de Riri e Albert, lous fugitieux FTP...

Aquí fouguèt lou tendrinèl nisou de Pau Valière, lou breç de la lengo lemosino que l'o toutjour pau o prou segut, cado jour, al Felibrige soubretout.

Pau aquó's tabe lou Vigenal, un quartié de Limotges ount soun paire èro poulicié, dins la Pouliço Naciounalo ; las escourregudos dins lous bosces, lou de l'Òumeleto pressemble, la musico al patrounatge amé « Vigenal's scott pipers », praco pas dafèt la lengo d'Oc aiço, ni mai Lou Lemosin..., mès cha ben que junesso se passe, ame lous antres joubes del païs... E Pau aimabo tabe se deslaïa, dança, a Chaucre pressemble, en bacanço, l'estieu, en l'ilo d'Oleroun ; o quond èro à Paris, al dançadou aubernhás lou « Balajo », ount auriom pougut nous capita !

Pau aquó's l'abisat escoulan de l'Immobièro a Limotges, qu'aimo bien las scièncos naturèlos e l'istorio/geografio, el que soumio d'estre ensenhaïre, e fi finalo se troubaro poustièr, « ome de letros » que disió ame soun ironio chinhardo. A la debuto trio lou courriè a Paris/Austerlitz, sa « campanha d'Austerlitz », que disió tabe, ame la mèsmo ironio fresço ; pièi un countour per Colomb Bechar en Algerio, dabons de rejounhe, tapoun 1966, Pèiro-Bufèiro e soun buréu de Poste tout nòu, ount debendró lou mèstre, entró la retirado.

Chal dire qu'aquí, chas el, Pau abió troubat bien bitamen l'amo-sorre, ame Mario-Claudo, Mimi, un ronc l'un per l'autre, e pièi Nathalio sa filho, siono e tont procho, « tont aimado » !

Aitá, pendent 52 ons, dusc'al 22 de junh 2019, que Pau s'en anèt sutió, defuntat a la subito, nous laissèt toutes aquí, couets ! Aquó's èro un dissate, un « Week-End » que se dis aro, un jour de repaus, de segur ? Òu que nou ! Al trabal, pulèu, a Tullo, a 70 kiloumestres de Pèiro-Bufèiro, luèn de chas el, al Cèntre Roubert Joudoux.

Aquó's èro lou jour dedicat a la Soucieta Istourico e Regionaïsto del Bas-Limouzi ; Pau abió repres lou flambèu, a la presidencio, directur tabe de la rebisto Lemouzi, après la despartido del Majoral Roubert Joudoux, tres ons dabons la siono, 2016, al jour près, jour per jour ! Encaro un inbestissamen de Pau, dins l'animacièu dels sentimens de l'eime regionaï : parla, acostumados, istorio, art e tout lou patrimoni..., a destinacièu de toutes lous Lemosins, d'aici e d'alhurs, despatriats tabe, soubretout !

Entretont, nostre amic Pau s'èro bailat tabe a sa bileto tout entièro, a Pèiro-Bufèiro, e a sa coumuno. Abió tont òbra per elo, per soun païsou, sons jamai chifra soun temps : dels joubes e lur « club », als repais campanhards ; de l'espausicièu chinarralho al coumitat de las festos ; e mai que mai a la merio e a la municipalitat, counse-adjoint qu'èro estat, tourna reéligit. Èro fièr de sa poulido bileto, e s'en soucirabo !

Ome de fe, Pau abió toutjour gardat « soun lum atubat », coussi disió Nathalio a sas òsseques. Èro aderent de la fort couneigudo e apreciado Counfrario de Sent-Loup, un sent del lioc, al

sègle septem ; uno counfrairio de souldaritat e de frairetat, espelido sus Limotges en 1153, i auró lèu nòu cents ons d'aquó !

S'èro imbestit dins sa parròchio, toutjour preste per ajuda, coumo toutjour.

Que n'ò acoumpañats de parrouchians per lur darnió biatge ! Que n'ò dichos de paraulos apaisentos, e que s'achababou souben per aquesto fourmulo, en s'adreçant als fidèlos : « Hé bé, aro sap ! »

Entrat en Felibrige tonlèu 1981, ou abem dich, pièi d'annados de temps secretari, baile, de la Mantenço de Lemosin, ount Pau faguèt probó de forços qualitats e de counsentido generalo. Tabe fouguèt noumat Mèstre d'Obro en 1988, elegit sendi en 2003, e Felibre Majoural a la Santo-Estello de Castihounés, en remplaçamen del rencurat Majoural Jòrgi Girard, lou 22 de mai 2010. Pau Valière èro lou sièisen titulari de la Cigalo de l'Òrt.

Creado lou 21 de Mai de 1876 en Avinhon, la Cigalo de l'Òrt se sono tabe Cigalo de Lansargue, perque soun prumio titulari, Alexandre Langlade, que la pourtèt sus las fonts del batèmo, èro nascut a Lansargue, en 1820, e ount barrèt lous uels 80 ons pus tard, en 1900.

L'Estanth de l'Òrt, que s'estiro sus mai de 3000 ectaras, entremièch la terro e la mar, es « un pitit coenh de Paradis », nous dis Pau.

Se dis que dins lou temps, sus las ribos bounifiados pels debords del Rose e del Vidourlo, poudió se trouba en aboundóncio d'ourtalho e de frucho goustousos, amai de flours saubatjos ! « Estanth de l'Òrt », del berdiè, que se sounèt adounco dinc aquel país de Lengadòc ! E es aquí dinc aquel crane « coenh de Paradis » qu'es nascudo la Cigalo de l'Òrt, « la filha de la vinha, dau solelh e de l'aiga », que se pausèt sus lou bestoun de Pau Valière a Castihounés en 2010.

« *Quela cigala es soubretout lo simbòu de l'amistat vertadièra, de l'amor frairenau e de la fidelitat a nòstre movament* », diguèt Pau aquel jour.

E Pau l'empourtèt en Lemosin, aquelo Cigalo de l'Òrt que, praco, abió bescut touto sa bido dins lou Mièchjour, dempièi sa creacieu, de 1876, e d'aquí a l'annado 2010 e la Santo-Estello de Castihounés, es a dire pendent 134 ons !

E pendent dèch ons, Pau Valière la passegèt « sa » Cigalo dins soun amistous Lemosin natal. Que, de fèt se dounabo lou Majoral ! Tont e mai après Castihounés qu'abons. Ou abem déjà un pau bist : dempièi sa bileto de Pèiro-Bufèiro ame sa merio, sa parrochio tabe, ount èro fort imbestit, tont ame l'uno coumo ame l'antro ; toutos las actibitats liados al Felibrige, aquó bai sons dire (Consistori, Santo-Estello, felibrejados -e aquí me ben en memorio lo de Chalus que Pau abió ourganizado en 2007, ame la municipalitat, e per l'ouro, la darièro tengudo en Lemosin, dins l'estile que recampo de milassados de persounos dinc uno bilo abandèirado e barrado a las boueturos- escola felibrengo tabe qu'abió durbido el-mèsme a Peiro-Bufèiro...) ; ame lous joubes tabe, e lur club ; lous bièlhs e l'Ephad ; lou Coumitat de las festos ; la troupo foulclourico « Estello Lemosino » : « n'oblidarem pas la tropo « Estello Lemosino » que dins la Cor d'Amor a bravament mostrat l'eime dau terraire lemosin » (per la Sto-Estello de Pertus), manquèt pas de souslinha lou majoral Jan-Loup Deredempt, noubel sendi de Lemosin... Amai foro lou « 87 », a Tullo dins la Corrèzo presemble, ame la « Soucieta Istourico e Regionallisto dóu Bas-Limouzin » e la rebisto Lemouzi...

S'es bien passejado en Lemousin la Cigalo de l'Òrt, o bien trabalhat ame Pau Valière, dieu tabe l'abère presat aquel país un pau rescuogat, de mièjo mounthonho, al temps un pau fresquet proubaple, mès al mounde afaple, chaldeirous mèsme, souto un bernís un pau rufe !

Tabe s'es tout eschás dabalado (chal dire que, en Oc, poudió pas mounta gaire pus nalt que Limotges), tournado en bas, o pas salta las Cebenos. Lou País Gabalo bai li fa un brabe acuel, l'Aubernho tabe, ount pourró finta lou Lemousin besí, e belèu coucounha Pau Valière, drech dins sas bagous, fidelò en amistat !

Coumo es escrich dins lou verbau de la sesilho del Consistori, lou 23 de novembre 2019, reprent uno dicho de nostre Capoulié : « Aquelo freresso que Mistral recoumandavo, Pau Valière l'a toujour praticado, boutado en avans em'uno bounta delicato, em'un gáubi fin, em'uno avenènço sourrisènto, em'uno fidelita franco : uno sincerita que jamai óublidaren. »
Saique noun, l'óublidarem pas !
Adieussiatz, Pau...

Pau ASTRUC

Félibrige - texte original